



# Tyonbo en kou!

**T**yonbo en kou bannla! Eski nou pou touzour dan sa kales kase ki nou ladan? Eski nou pou toul-tan pe trimouse san vwar en laklerte?

Nou Seselwa pour nou. Nou laliberte; nou Lendependans pa ti donn ni Angle, ni Arab e ni Larisi. Lendependans ti donn nou, bann Seselwa me nou pa endependan dan nou prop pei. Si nou ti vreman lib e endependan, nou ti pou kapab al lo lans ki nou nou oule; ganny nenport travay ki nou kapab fer e koz mannyer nou oule. Malerezman nou bezwen lager travay avek etranze. Ler nou koze, nou bezwen get dekote parey manrmay avan koup semen pangar enn antre nou a va al raport nou e nou a ganny pini. Be sa pa en lanfer ki nou ladan?

Erezman la mazorite Seselwa

in determinen sorti dan sa lanfer. Sakenn pe fer son bout. Pa bezwen fer gran tralala pou donn kouraz lezot frer ek ser Seselwa retir sa lalyann anvaisan lo nou latet. Nou bezwen zis senpleman koz ek sa enn ki obor nou e ansanm pran desizyon pou vot pour en lot dirizan ki pli kapab ki Misel. Avek determinasyon, nou bezwen donn sipor tou bann ki pe deza travay pour met en lafen avek sa sistenm



diktater. I annan fason senp pou fer sa.

Zot pou organiz tou kalite aktivite dan distrik pou fer dimoun santi zot alez. Zis mazine pour dir tousala en laganm bat latet nou bann zenn. I annan antre zot pou ganny ofer dyob travay. Sa en lot mannev ankor. Tou Seselwa i bezwen ganny en dyob. Eski prezan ki zot vwar ou pou donn ou en dyob? Zot pou fer ou anpli tou sort kalite laplikasyon; pour lakaz ouswa en bout later e menm pour en lonn biznes. Tou zafer pou pare zis avan eleksyon me zot pa pou donn ou konmela akoz pa ti zot lentansyon donn ou. Eleksyon pou pase e ou pou ankor pe espere. Petet dan senkan ankor ki zot pou vwar ou.

Seselwa in fini vwar zot simagri; nepli ler pou fer Seselwa al dormi boner!

## Partisip dan politik

**D**an sa pei, zot in fer Seselwa krwar zis en bann dimoun ki annan abilite e kapab partisip dan politik. Sa en mannev pou donn politisyen kontrol lo lavi Seselwa; zot bezwen ou zis ler pou vote. Ler eleksyon in fini, politisyen i fer sa ki zot oule. Zot ranpli nou latet ek tou sort kalite promes ki zot pa

zanmen garde. Zot dir zot pou met larzan dan pos Seselwa me apre zot anpli pou zot san gete si Seselwa i annan en gren diri dan zot lasyet. Zot promet pou amelyor nou lapey me apre zot double sa ki pour zot tandis ki Seselwa i bezwen kontant li avek enn pti senk poursan par isi ek enn pti dis poursan logmantasyon par laba.

Tou le senk-an, zot oule ankor senk akoz zot krwar zis zot ki kapab organiz nou lavi. Ozordi nou depan lo gouveman pou ganny en lakaz, en laysens e zot menm ki decide kote nou pou reste. Nou lapey pa ase e zot ki decide ki kantite lasistans sosyal nou pou gannyen. Si zot decide pa donn ou, ou bezwen al siplyi zot

ziska zot donn ou de pti kas ki pa zanmen ase. Sa sitiasyon fodre nou sanze.

Seselwa en nasyon tre entelizan. Nou annan kapasite pour fer bokou plis endividuelman e kolektivman. Nou lavi i vin meyer ler nou partisip dan lavi politik nou pei e kontribye dan tou desizyon. Nou annan kapasite e kapab fer en diferans ler nou partisip dan tou deba e fer *(Kontinyen lo paz 2)*

# Partisip dan politik

tande nou lavwa. I nou dwra met presyon lo lotorite politik e gouvènanman pou demann sa ki nou nou oule. Person pa kapab fer nou nanryen.

Nenport ki parti politik ki nou aflye nou avek i bezwen osi ekout lavwa son siporter. Manm en parti politik pa zis vin rali me i osi kapab pran pozisyon kle dan parti si i annan abilite. Sel fason

pour fer sa se atraver partisipasyon. Si ou annan potansyel, napa fason ou pa a fer li. Apre tou, en parti politik ki krwar dan lademokrasi i bezwen egzers li dan son parti avan. Si i pa fer li dan son parti, eski i pou fer li letan i ganny pouvwar?

Nou pa kapab kontinyelman les enn de boug zwenn ansanm, kree en parti politik e vin

demann nou nou vot san konpran byen ki sa parti i oule fer pour ou e Sesel. Sel fason pour ou konnen si zot vreman senser se pou ou la ek zot, partisip ek zot e vwar pour ou menm si zot fer sa ki zot dir. Akoz ou pa kapab ou osi vin en lider politik e en kandida prezidansyel si ou annan kapasite? Sesel i bezwen le meyer dan gouvènanman; zonn sens-

er e onnet, zonn ki kapab e ki travay dir. Akoz pa ou? Pa bliye, si ou pa partisip dan politik, bann ki pli bet ki ou pou toultan ansarz ou. Kot SUP, nou ofer ou sa posibilite grandi e fer ou kontribisyon. Vini e ansanm nou a travay pour Sesel e tou Seselwa! Nou envit ou Dimans le 14 Zen dan sant konferans STC kot nou pou esplik ou program nou parti. Desanm e komans partisip dan politik pour en meyer lavenir pour ou avek ou zanfan.

## Kabo soter

**K**anpanny ek kankan politik i kontinyen. Sa zafer pou ale ziska ler Ton Misel i a fou en lape. Seselwa a montre li laport e i a vin en prodikter televizyon si i oule. I a fer en program pou tou bann dimoun ki ganny difikilte dormi. Ki sekre sa boug i annan pou fer dimoun ronfle sonmey person pa konnen. I annan en danze dan tousala. Si ou tro dormi dan sofa, ou pou kapab malad ou leren. Ek sa lavi dir, kote Seselwa pou ganny televizyon pou met dan zot lasanm?

Antouka bougla pe kontinyen travay dir e pa dormi pou li kapab kontinyen ansarz nou. In deside les nou trankil pour le moman. I paret in donn lord NDEA aret travay. Konmela ou pa ni vwar zot dan kanton. Zot pa kapab fatig latet droger sansan zot pa pou vot pou bann kabo soter. O-kontrer, droger pe ganny byen gete. En bann pe ganny bon larzan pou al detoks me zanmen zot ariv kot sant. Droger konmela ki anmenn droger lopital. Kabo soter pe fer sir zot reste dan kazye. Tou fason may kazye pa ase tipti.

Dray mannyer ou oule lo semen konmela. Lapolis trafik in osi rar.

Pa tro lontan, drayver ti ganny arête de-trwa fwa dan en zournen. Ozordi ou kapab dray mannyer ou oule. Lord in donner pou pa disterb Seselwa e pa fer zot ankoler ditou. Fodre zot al vote byen ere. Koumsa zot a vot pou sef kabo soter.

Daya i travay ziska tar dan lannwit konmela. Zanmen ou pou vwar li dan biro. Si ou oule vwar Ton Daya, swiv sa konsey. Al dormi bonner e leve dan minwi. Fer letour dan bann bar e ou a bezwen bat ek li dan enn. Normalman i antoure par en ta zenn fiy. I dir tou dimoun i pe fer kanpanny. I menm fer aktivite karpè rouz pou zot. I tre vantar e pe esplik tou dimoun ki in aprann fer kanpanny avek Per Fondater. I dir Ton Albert ti toultan dir li kanpanny ou fer ek tou sa ki ou annan; menm ou dernyen san roupi. Arrrrrr! Daya pe donn san roupi e son lantouraz byen kontan. Ler Daya i al dodo, i reste li zis son san roupi byen

kraz, kraze. Pov dyab. Ledwa Albert i pa pou zanmen tyonbo.

Dan Mon Bikston ki annan kankan. Lakanbiz baka pou en siporter lopozisyon e bann kabo soter pe tay laba. Simon i dir ras bougla son permi vann baka akoz tro bokou kabo soter pe sot laba. Gran madanm i dir pa fer sa fot e fer kabo soter dan lakanbiz pran laraz. Zot in vin ek en plan pou donn en kabo soter laysens vann baka li osi dan distrik e zot a donn li otan baka ki i bezwen pou nanryen. Koumsa tou kabo soter a ralye ansanm. Zot in kriy enn de kabo soter fidel. Leker madanm ti pre pou arête ler bannla ti dir li donn son manman baka i a vann. Enn pli arogan in dir li met son baka dan en landrwa kot soley pa tape. Tousala!

### LENVITASYON

***‘Seselwa United Party’ i envit piblik kot prezantasyon son program politik ki pou fer Dimans le 14 Zen dan Sant Konferans STC, Laveni Bwa de Roz depi 3 z-er edmi apremidi. Nou a zwenn ou laba!***

## “Annou Repran Nou Pei”